

Date – 18/05/2025

Time - 7:30 Hrs

HEADLINES (MORNING)

- 1. Excise Minister Pu Lalnghinglova Hmar chuan Ruihhlo chu mizo mipui zawng zawng ten an do a ngai tih a sawi.**
- 2. Kolasib district chhunga awm Saiphai khua te chuan an ration buhfai lakna kawngpui siam tha in nimin khan an hnattlang.**
- 3. Chief Minister Pu Lalduhoma chuan nimin khan Lungleng khua a tlawh a. An khaw ramah Territorial Army Batallion Hqtrs hmun tur remchang a awm dawn em tih a en nghal.**
- 4. Sorkar chuan Operation Sindoor in Pakistan a terrorism laka India dinhmun sawi turin ram hrang hrangah party hrang hrang hruaitute pasarih palaiin a tir dawn.**

<><><>

EXCISE MINISTER & CYMA

Excise Minister Pu Lalnghinglova Hmar chuan Ruihhlo chu Mizo mipui zawng zawng ten an do a ngai tih a sawi. He thu hi nimina Adventist Youth Ministries, Seventhday tlang kohhran buatsaih “Drug Awareness Sabbath” ah sawiin Excise Minister chuan, Ruihhlo hi kan zavaia tangruala do a ngai a; Kohhran hrang hrang thalaite an pen chhuak thin hi a hlu a takzet a ni, a ti.

Adventist Youth Ministries-te hian nimina an hun hmanah hian ruihhlo that lohzia inzirtirna drama intihsiakna hmuhnawm leh zirtir nei tha tak an buatsaih baw a ni.

Tun hnaia Central YMA thu chhuah tarlan danin, CYMA hnuaia Central Anti Drug Squad chuan kar khat chhungin ruihhlo thahnem tak an man a, hemi kaihhnawihah hian mi 36 man an ni baw.

Central YMA hnuaia ruihhlo dotu pawl, Central Anti Drug Squad (CADS) chuan May ni 10-16 chhungin Heroin Hawng 7 leh Tictac bur 84; Zolplox mum 70 an man a. Hemi kaihhnawiah hian mihring 36 manin, mi 25 chu Counselling an pe a ni. Excise and Narcotics Department te nen tunlaia ruihhlo leh a kaihhnawih dap chhuah chungchangah dan palzut lo a thawhdunna tha zawk an neih theih dan tur an sawi ho a, Excise & Narcotics Department Joint Commissioner Pu Peter Zohmingthanga chuan kalkhawmte chu mi man leh bungraw rinhlelh dapna kawnga dan zawm ngai hrang hrang te a hrilhfiah a, CADS Convener, Pu Roneihthanga Central YMA Treasurer ni baw chuan, khawtlang himna atana Excise leh YMA ten thawhdunna tha tak hnuaia ruihhlo do kawnga an hmalakna chu lawmawm a tih thu leh an hnathawh chuan rah tha zawk a chhuah ngei a beisei tih a sawi a,

Kalkhawm te hian ruihhlo in ram leh thalai te a tihchhiat nasat thu leh a ven nan theihtawp chhuaha thawhdun zel an tum thu an sawi a. Hemi kawngah hian ram mipui leh tlawmngai pawl dang te puihna an ngen baw a ni.

<><><>

SAIPHAI

Kolasib district chhunga awm Saiphai khua te chu an ration buhfai lakna kawngpui siam tha in nimin khan an hnattlang. Vairengte Kudam atangin Bagha kaltlangin - Saipum, Saiphai leh N. Chawnpui khua te hian Ration buhfai hi an khua ah an phur lut thin a, Vairengte atanga Phainuam kaltlangin Saiphai kawng NH-306 (A) a that hnua, Assam lama kual kher lo in he kawngpui kaltlang hian heng buhfai hi an phur thin a ni.

Kumina ruahtui tla avangin hmun thenkhatah he kawngpui hi kal hleihtheih loh khawpa a chhiat tak avang leh lirthei ten harsatna an tawh thin avangin nimin khan Saiphai Village council huaihawtin kawng chhe zual lai siamtha in an hnatlang a; PWD lamin kawngpui a phah tur Lung ngaihtuahin JCB an thawhchhuahpui bawka, heng lung te hi khawtlang hnatlangin an phah a. Saiphai khua chhungtin atangin pakhat tal thawkchhuak turin VC ten ruahmanna siamin hnatlangah hian mi thahnemtak an thawkchhuak a ni.

(Phainuam leh Saiphai inkar kawngpui hi kum 2017 khan siam a ni a, hemi hnu hian thawm that a ni leh tawh rih lo. He kawngpui hi Mizoram PWD enkawl niin, short term maintenance thawk turin company kut a dah ni mah se, company lam hian an ngaihsak tawk lo a, Phainuam khawtlang hruaituten PWD Minister hnena thil awm dan an thlen hnuah PWD chuan tunhnai khan kawng khuar leh chhia hnawhna tur lung an dah a ni.)

<><><>

PVL

Mizoram chhunga Volleyball inelna lian ber EverHome Pro Volleyball League (PVL) chu nizan khan League Round khelh zawh a ni a, mipa inelna huangah semifinal khel tur team pali a hriat kim ta chiah a ni. Inelna hi LPS Arena, Falkland Vengah neih niin, nizan khan Tuichangral chuan Sihphir chu 3-1 in an hneh. Tuichangral bakah hian Khawbel, Anastasia Electric Veng leh Thutak Nunpuitu Team (TNT) ten semifinal hi an lut. Hmeichhe lamah Jimmy Kanan leh Luangmual te chuan final an lut tawh thung. Mizoram Volleyball Association buatsaih Pro Volleyball League hi, ruahman dan chuan May 19, Thawhtanni zanah hmeichhe inelna hmawr bawk a ni ang a, May ni 19 leh 20-ah mipa semifinal khelh zui leh a ni bawk ang.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Vawiin chawhnu dar 2 leh a chanve-ah Chanchinthar puan leh a ni ang.

<><><>

MIZO TERRITORIAL ARMY

Chief Minister Pu Lalduhoma chuan nimin khan Lungleng khua a tlawh a. An khaw ramah Territorial Army Batallion Hqtrs hmun tur remchang a awm dawn em tih thlithlaiin, Bethel Ministry in Human Development Centre din an tumna hmun a enpui nghal bawk.

Chief Minister hian Lungleng khawtlang hruaitute kawm bawkin Lungleng lal Khamliana in kawtah hun hman a ni a. An khawtlang mamawh hrang hrang te Chief Minister hnenah hian an lo thlen.

Tun hnai khan Mizo Territorial Army dinna tur thil pawimawh ngaihtuahin Coordination & Land Search Committee an thukhawm a, Mizo Territorial Army dinna atan thil pawimawh ngaihtuah turin Mizoram Sorkar chuan Thawhlejni khan Coordination & Land Search Committee hi a din a, Territorial Army Company 2-te lo awm lailawkna tur Aizawl leh Lungleiah zawn ni se, an ti a. Territorial Army-ah hian Mizo thalaite an luh theih nan ruahmanna hrang hrang lo kalpui turin Mizoram Youth Commission leh Sainik Welfare & Resettlement chu ruahmanna lo kalpui tura ruat an ni.

Coordination & Land Search Committee Chairman Pu Clement Lalhmingthanga chuan tunhnai khan Mizo hlang awmna Territorial Army (TA) Company pahnih (2) din a ni dawn tih alo sawi tawh a, hemi atan hian kumin June ni 24 atangin Recruitment Rally chu District wise a neih tan a nih tur thu sawiin Central Sorkar in quota a siam sak chu Mizo thalaiten a vaia hnawhkhat thei turin Recruitment Rally-ah hian Mizo thalai tam thei ang ber inlan turin a sawm a. He hamthatna hi um a, thahnem ngai taka a hlawkna tel ngei turin a sawm bawk a ni.

<><><>

MOTOCROSS

India rama Motocross intlansiaka Prize Pool sang ber Amawii Hero Monsoon Challenge chu nimin khan Champhai Bethel Field-ah neih a ni. Inelna hi Champhai District Motor Sports Association nena tangruala neih niin, Motor Cycle intihsiaknaah hi Champhai Addl. DC Pu K. Zorammuana chuan khuallian niin a hmanpui a, intihsiakna hi a hawng. Pu K. Zorammuana chuan hetiang infiamna hautak zet mai buatsaih tura mi inpe te fakawm a tih thu a sawi in 2wheeler hmanga intlansiak nuam ti em em thalaite'n kawngpuiah intlansiak an ching thin a, hei vang hian mi tam tak chesual tawhin nunna chan hial pawh an awm tawh thu a sawi a, chutianga thalai tha za tak te tana hetiang hun an siam chu lawmawm a tih thu sawiin chhunzawm zel turin a chah a, Monsoon Challenge hi a hawng a ni.

Mizoram pum huap Motocross Racing Monsoon Challenge ah hian Racer mi 50 vel kalkhawmin Category hrang hrang - Rookie, Novice, Expert, Xpulse one make race leh Local Class ah te an intlansiak a, Price Pool hi cheng nuai khat sing nga a ni.

<><><>

Operation Sindoor

Sorkar chuan Operation Sindoor in Pakistan a terrorism laka India dinhmun sawi turin ram hrang hrangah party hrang hrang hruaitute pasarih palaiin a tir dawn . Palaite hian tun thla tawp hian thawhpui ram pawimawh tak tak an tlawh dawn a, UN Security Council member ramte pawh an tlawh dawn a ni. An zingah hian political party hrang hrang MP te, politics a mi langsar tak tak, leh diplomat langsar tak tak te an tel dawn a ni. Firfiakte chet dan leh a dona kawnga India in hma a lak dan techu an hrilhriat tir dawn a ni. Heng palaite hian India thuchah nghet tak, firfiakte ngaihnathiamna pakhatmah India in a neih dawn loh thu an kalnaah te hian an sawi dawn a ni.

<><><>